

仁

獄

類

編

仁獄類編卷之十三

新安余懋學行之父纂

弟懋游叔常父閱

甥韓起龍校梓

嚴毅

凡二十四則

蓋崔寔之論曰以嚴致平而洪範之論三德亦曰疆弗友剛克沉潛剛克子產又曰政寬則民慢慢則糾之以猛是知嚴固未能盡軌于中道然苟時合乎用重之宜則貴戚斂手于朝堂豪

宗重足于閭右。枹鼓息鼙于郊外。萑苻戢迹于澤中。以視長奸裕蠱之治。其得失蓋較然矣。夫臨百仞之淵。而人無失足者。惕也。炎崑崗之火。而人無焦爛者。避也。豺狼虎豹之在山。而人無敢入者。畏也。夫嚴亦深淵。猛火豺狼虎豹之類也。且惕且避且畏。而人莫敢有犯之者矣。夫人莫有敢犯之者。則刑且不用。是可以爲政矣。爰彙嚴毅。

漢武誅王恢

漢武帝時王恢建議擊匈奴亡功還下恢廷尉廷尉當恢逗撓當斬恢行千金丞相蚡蚡不敢言於上而言於太后曰王恢首爲馬邑事今不成而誅恢是爲匈奴報讐也上朝太后太后以蚡言告上上曰首爲馬邑者恢故發天下兵數十萬從其言如此且縱單于不可得恢所部擊之猶頗可得以慰士大夫心今不誅恢無以謝天下於是恢聞廼自殺

賈彪案殺子

東漢賈彪補新息長。小民困貧多不養子。彪嚴爲其制。與殺人同罪。城南有盜劫害人者。北有婦人殺子者。彪出案發。而掾吏欲引南。彪曰。賊寇害人。此則常理。母子相殘。逆天遺罪。遂驅車北行。案正其罪。城南賊亦面縛自首。數年間人養子者數千。僉曰。此賈父所長。生男名曰賈子。生女名曰賈女。

### 陶侃鞭持稻

晉陶侃爲荊州刺史。嘗出遊。見一人持一把未熟稻。侃問用此何爲。人云。行道所見。聊取之爾。侃大

怒曰。汝既不佃而戲賊人稻。執而鞭之。

琇之按小兒

孔琇之仕齊爲吳令。有小兒年十歲偷刈鄰家稻一束。琇之付獄案罪。或諫之。琇之曰。十歲便能爲盜。長大何所不爲。縣中皆震肅。

元紹杖趙修

北魏元紹遷尚書右丞。決斷不避疆禦。宣武詔令檢斷趙修獄。紹以修佞幸。遂加杖罰。令其致死。帝責紹不重問。紹曰。修姦佞甚于董賢。臣若不因釁。

除之。恐陛下復被哀帝之名。宣武以其言正。遂不罪焉。

張錫判盜麥

張錫朱梁末爲棣州刺史。劉君鐸軍事判官。棣爲鄆之屬郡。郡有麴務。鄆以牙將主之。頗橫恣。民有犯麴三斤。牙欲寘於死。君鐸力不能救。旣而牙將盜麥伯斛。私造麴事。覺。錫判曰。麴犯三斤。求生不克。麥盜伯斛。免死。誠難。郡吏爲之乞免。錫不從。因寘於法。

元忠殺橫奴

唐魏元忠。檢校洛州長史。治號嚴明。張易之家奴。暴橫甚。元忠笞殺。權豪憚伏。

李臯奏宦子

唐李臯。加少府。嘗行縣。見一媼垂白而泣。哀而問之。對曰。李氏之婦。有二子。鈞。鏐。宦遊二十年。不歸。貧無以自給。時鈞爲殿中侍御史。鏐爲京兆府法曹。以文藝登科。名重於時。臯曰。入則孝。出則弟。行有餘力。然後可以學文。若二子者。豈可備於列位。



由是舉奏竝除名勿齒。

### 權範杖臺吏

唐權寔子範爲殿中侍御史。知巡。有小吏從市。有取事發。笞十數。他日復有如此者。白于臺長。杖背十五。同列疑其罪同。罰異。權對曰。前吏所取者名屬左軍臺之威。令不振久矣。百司尚有不稟命者。况籍禁軍之勢。耶彼受賄於此輩。猶是抑豪強。可。以末減。後吏則挾臺之威。以恐百姓。杖背猶爲至輕。

盧鈞配虞候

唐盧元公鈞鎮北都。推官李璋幕中飲酒醉。決主酒軍前虞候。明日元公出赴行香。其徒伯八十人橫街見公。論無小推巡。決得衙前虞候例。元公命收禁責狀。至衙命李推官所決者。更決配外鎮。其餘虞候各罰金。內外不測。璋惶恐。衣公服求見公。問何事。公服請十郎袴衫麻鞋相見。璋欲引咎。公語皆不及。臨去曰。十郎不決衙前虞候。只決所由。假使錯誤。亦不可縱。况太原邊鎮。無故二伯虞候。

橫欄節度使。須當挫云。

秀實爭犯盜

唐段秀實爲涇州刺史。馬璘加開府儀同三司。軍有能挽二十弓而犯盜者。璘欲免之。秀實曰。將有私愛。則法令不一。雖韓白亦不能復理。璘善其議。竟殺之。

一錢斬桀吏

宋張忠定公詠爲崇陽令。一吏自庫中出。視其鬢傍巾下有一錢。詰之。乃庫中錢也。詠命杖之。吏勃

然曰一錢何足道。乃杖我邪。爾能杖我。不能斬我。也。詠援筆判云。一日一錢。十日一千。繩鋸木斷。水滴石穿。自仗劒下堦。斬其首。申臺憲自効。

### 忠定戮訛言

張忠定知益州。民間訛言。有白頭翁。午後食人男女。公召犀浦謂曰。近訛言惑衆。汝歸縣去。訪市肆中。歸明人尚爲鄉黨患者。必大言其事。但立證解來。明日果得之。公遂戮於市。卽日帖然。夜市如故。公曰。妖訛之興。沴氣乘之。妖則有形。訛則有聲。止

訛之術在乎識斷不在厭勝。

忠定斬逃亡

張忠定知益州。李順黨中有殺耕牛避罪逃亡者。公許其首身。拘母十日。不出。釋之。拘妻一宿而來。公斷云。禁母十夜。留妻一宵。倚門之望。何疎。結髮之情。何厚。舊爲惡黨。今又逃亡。許令首身。猶尚顧望。就市斬之。於是首身者繼至。竝遣歸業。民悉安居。

順之械豪橫

宋胡順之知休寧縣。民有汪姓者，豪橫，縣不能制。歲租賦常不入，適以訟逮捕，不肯出。順之曰：「令不行，何以爲政？」積薪而焚之。豪大駭，少長趨出叩頭。伏辜，推其長械送州，致之法。

### 劉湜趣焚屍

宋劉湜知耀州。富平有盜掠人子女者，旣就擒，陽死。伺間復逸去，捕得。復陽死，守者以報。湜趣焚其屍。

### 公弼斬杖卒

宋呂惠穆公弼徙知成都府營卒當杖扞不受曰  
寧以劒死公弼曰杖乃國法劒乃軍威請杖而復  
斬之軍府肅然

韓絳斬冷青

宋韓獻肅公絳仁宗時爲開封府推官有男子冷  
青妄稱其母頃在掖庭得幸有娠而出生已府以  
爲狂奏流汝州絳言留之在外將惑衆追青窮治  
蓋其母常執役宮禁嫁民冷緒生一女乃生青遂  
論棄市

高登論陰德

宋高登富川主簿攝獄事有囚殺人守欲奏裁曰陰德可爲登曰陰德豈可以有心爲之殺人者死而可幸免則被死之冤何時而銷

悅娼魔妻獄

宋韓繹字仲元從晏元獻公殊辟爲永興倅有富家子悅娼柳約爲夫婦而父母強爲取妻乃謀之市卜教以厭蠱期妻必死可取娼則厚酬之旣而妻果病死妻父母聞之官晏公不信曰世顧有是



和釋固請鞫之。遂得實。發地藏木偶人。具其妻名氏。生時與咒咀之時。晏公大驚。遂嚴治以法。

包恢沉姦僧

宋包恢理宗時知隆興府。有母訴子者。年月後狀作疏字。恢疑之。呼其子泣不言。及得其情。乃母孀居。與僧通。惡其子諫。以不孝坐之。狀則僧之爲也。因責子侍養。跬步不離。僧無由而至。母乃托夫諱。日入寺作佛事。以籠盛衣帛。因納僧於內。以歸。恢知之。使人要之。置籠公庫。旬餘。吏報籠中臭達於

外恢命沉于江。語其子曰。爲汝除此害矣。

### 子繡榜亡賴

宋趙子繡尹臨安府。時元宵張燈甚盛。遊人繁夥。有無賴子造五色印。於人叢中印婦人衣。印文云。我惜你。你有我。白用黑。藍則用黃。鬧市中殊不覺也。次日視之方駭。雖貴官良眷無不含羞點污事。聞於趙。趙素以彈壓自負。命總轄捕索之。督責甚酷。捕者乞勿張皇。更寬一夕。可以計獲。卽於牙儈處假數婢。飾爲村婦出遊。自後視之。至喧鬧處亡。

仁宗朝 卷之二十三  
一  
賴果如前所爲。俱就縛。其爲首者。乃睦親宅宗子也。素號欄街虎。府尹以叔父行。戒云。俟坐衙押來。不得言是宗子。遂命左右以巨箠笞之。雖叫呼。竟若不聞。須臾榜死。趙卽自引。得旨放免。時人服其剛決云。

### 文傳罪悍妻

元于文傳。仁宗時爲烏程尹。有富民張甲之妻王無子。張納一妾于外。生子未晬。王誘妾以兒來。尋逐妾殺兒焚之。文傳聞而發其事。得死兒餘骨。王

厚賄妾之父母。買鄰家兒爲妾所生兒。初不死。文  
傳令妾抱兒乳之。兒啼不就乳。妾之父母吐實。乃  
呼鄰婦至。兒見之。躍其懷。乳之卽飲。王遂伏辜。

### 童孫罪不原

國朝永樂初。京中密察民俗甚嚴。有坐童孫毆祖  
母獄者。刑部主事李厚鞫其情。以童稚無知。非真  
有所毆也。上疏請恤。不聽。繼之以泣。明日。上以  
筯面試其童。曰。能識左右何謂無知。遂謫厚爲安

南椽。

按宋張詠鎮成都。日見一卒抱少兒戲廊下。小兒因怒。搯其父。詠集衆詰曰。此方悖逆。乃

自習俗幼已如此况其長成豈不爲亂遂罪之  
成祖之坐童者刑亂用重張公之見也李厚之請  
恤者匍匐入井孟氏之心也厚在安南三年后召  
爲吏部主事赴召僅五日而安南變作華人多不  
得歸人以爲  
仁厚之報

仁獄類編卷之十三終

仁獄類編卷之十四

新安余懋學行之父纂

弟懋游叔常父閱

甥韓起龍校梓

懲奸

凡三十六則

易之大有曰。君子以遏惡揚善。順天休命。夫順天休命。一揚善焉足矣。何遏惡爲也。蓋惡不遏。則善不安。且俾善者胥化而惡。此遏惡之義。所以獨先于揚善也。舜誅四凶。周公誅管蔡。孔子

誅正卯。子產誅鄧析。自昔聖賢。猶不能廢遏惡之義。况輓近世乎。余先後居鄉久。見一鄉皆善士。而有一人焉。恣睢其間。則弱者受其欺。強者慕其橫。式閭薰鄙之士。亦俛仰焉。而不得一試。此惡之所以爲善累。而遏之不可以已也。語曰。養稂莠者。害禾稼。夫欲爲禾稼計。則不得復爲稂莠惜矣。爰彙懲奸。

子產誅鄧析

子產治鄭。鄧析務難之。與民之有訟者。約大獄一。

衣小獄襦袴。民之獻衣襦袴而學訟者。不可勝數。以非爲是。以是爲非。是非無度。而可與不可日變。所欲勝因勝。所欲罪因罪。鄭國大亂。民口譴譁。子產患之。于是殺鄧析而戮之。民心乃服。是非乃定。法令乃行。

### 孔子誅亂政

孔子爲魯司寇。攝行相事。七日而誅亂政大夫少正卯。戮之於兩觀之下。屍于朝三日。子貢進曰。夫少正卯魯之聞人也。今夫子爲政而誅之。或者爲



失乎孔子曰。居吾語女。天下有大惡者五。而竊盜不與焉。一曰心逆而險。二曰行僻而堅。三曰言僞而辨。四曰記醜而博。五曰順非而澤。此五者有一于人。則不免君子之誅。而少正卯皆兼有之。其居處足以擷徒成衆。其談說足以飭褒榮衆。其強禦足以反是獨立。此乃人之奸雄者也。不可以不除。夫殷湯誅尹諧。文王誅潘正。周公誅管蔡。太公誅華士。管仲誅付里乙。子產誅史何。凡此七子。皆異世而同誅者。詩云。憂心悄悄。愠于羣小。小人成羣。

斯足憂矣。

子賤防樂寇

宓子賤爲單父宰。齊攻魯。父老請縱民獲麥。子賤不聽曰。不耕者得獲。是使民樂有寇也。

左氏易胥靡

衛嗣君時。

胥靡

刑人

逃之魏。

衛贖之。

百金。

不予。

乃請

以左氏。

名地

羣臣諫曰。

以百金之地。

贖一胥靡。

無乃

不可乎。

君曰。

治無小。

亂無大。

敎化喻於民。

三百之

城。

足以爲治。

民無廉恥。

雖十左氏。

將何以用之。

公孫議族解

漢公孫弘爲御史大夫。軹有儒生侍使者。客譽郭解。生曰。解顓以姦犯公法。何謂賢。解客聞之。殺此生。斷舌。吏以責解。解實不知殺者。殺者亦竟莫知爲誰。吏奏解無罪。弘議曰。解布衣爲任俠行權。以睚眦殺人。解雖不知此罪。甚於解殺之。當大逆無道。遂族解。

張湯誅伍被

漢張湯爲廷尉。伍被詣吏自告。與淮南王謀反。天

子以被雅辭多引漢美欲勿誅湯進曰被首爲王  
畫反計罪無赦遂誅被

### 夷吾罪亭長

東漢謝夷吾爲荊州刺史行部到南陽縣遇章帝  
巡狩幸南陽有詔勅夷吾錄見囚徒勿廢舊議上  
臨西廂南面夷吾處東廂列帷於其中夷吾首錄  
囚徒有亭長姦部人者縣言和姦上意以爲長吏  
以劫人而得言和且觀刺史決當云何須臾夷吾  
呵之曰亭長職在禁姦今爲惡之端何得言和切

讓三老孝悌免長史之官理亭長之罪上善之

定庵藉王實

齊詹定庵通判滑州兵馬司吏王實結宦官橫甚定庵一日攝行郡事適有訟實者捕寘獄籍其家贓萬計杖而黥之

詔便戮強暴

北魏涇州有女兒先氏許嫁彭老生爲妻聘幣旣畢未及成禮兒先率行貞淑居貧常自春汲以養父母老生輒往逼之女曰與君禮命雖畢二門多

故未及相見。何由不稟父母。擅見陵辱。若苟行非禮。正可身死耳。遂不肯從。老生怒而刺殺之。取其衣服。女尚能言。臨死謂老生曰。生身何罪。與君相遇。我所以執節自固者。寧更有所邀。正欲奉給君耳。今反爲君所殺。若魂靈有知。自當相報。言終而絕。老生持女珠璣。至其叔宅。以告叔。叔曰。此是汝婦。奈何殺之。天不祐汝。遂執送官。太和七年。有司劾以死罪。詔曰。老生不仁。侵陵貞淑。原其疆暴。便可戮之。而女守禮履節。沒身不改。雖處草萊。行合

古蹟宜賜美名。以顯風操。其標墓旌善。號曰貞女。

竇叅正殺父

唐竇叅。遷奉先尉。縣人曹芬。名隸北軍。芬素覓暴。因醉毆其女弟。父救之不得。遂投井死。叅捕芬兄弟當死。衆官皆請俟免喪。叅曰。子因父生。父由子死。若以喪延罪。是殺父不坐也。皆正其罪而杖殺之。一縣畏服。

公綽誅舞文

唐柳公綽。爲山南東道節度使。行部至鄧縣。吏有

納賄舞文二人。同獄。縣令以公綽素持法。必誅納賄者。公綽判曰。賊吏犯法。法在。姦吏壞法。法亡。竟誅舞文者。

李傑覘婦姦

唐李傑爲河南尹。有寡婦告其子不孝。其子不能自理。但云得罪于母。死則甘分。傑疑其冤。謂寡婦曰。汝寡居十年。惟有一子。今告之罪至死。得無悔乎。寡婦曰。無賴不孝于母。寧復惜之邪。傑曰。審如此。可買棺來取兒屍。因使人覘其後。寡婦出謂一



道士曰。事了矣。俄將棺至。僦冀其悔悟。再三喻之。婦堅執如初。時道士立於門外。密令人擒之一。問承伏。曰。某與寡婦有私。嘗爲兒所制。欲除之。乃杖殺道士及寡婦。以棺盛之。

仲榮射繼母

石晉安仲榮。鎮常州。有夫婦共訟其子不孝者。仲榮面加詰責。抽劍令自殺之。其父曰。不忍也。其母詬詈。仗劍逐之。仲榮重問之。乃繼母也。因咄出自後射一箭而斃。聞者莫不增快。境內以爲強明之。

政

賈郁決庫吏

九國誌載。閩賈郁。性峭直。不容吏人文過。爲仙遊縣令。及受代。有一吏酗酒。郁怒曰。吾當再典此邑。以懲此輩。吏楊言。公欲再作縣令。猶造鐵船渡海也。郁聞之不言。後復典舊邑。時醉吏爲庫吏。盜官錢數萬。下獄具狀。郁批榜尾曰。竊銅鑼以潤家。非因鼓鑄造鐵船而渡海。不假鑪錘。因決杖徒之。未幾移治福清。召爲御史中丞。

議繼母殺子

宋太祖嘗決繫囚。多得寬貸。而開封婦人殺其夫前室子。當徒二年。帝以其兇虐殘忍。特處死。下詔曰。自今繼母殺傷夫前妻子及姑殺婦者。同凡人論。

論常赦不原

宋開寶二年。初。峽州民范義超。周顯德中。以私怨殺同里常古直家十二口。古直小子留幸脫走。至是。擒義超。訴有司。峽州奏。引赦當原。太祖曰。豈有

殺一家十二人。可以赦論邪。命正其罪。

安禮譴斥妾

宋王安禮。知開封府。宗室令駢。以數十萬錢買妾。久而斥之歸。訴府督元直。安禮視妾。旣灸敗其面矣。卽奏言。妾之所以直數十萬錢者。以姿首也。今灸敗之。則不復可鬻。此與炮烙之刑。何異。請勿給其直。而加重譴。以爲戒。詔從之。仍奪令駢俸。

梁適論詛殺

宋梁適。爲審刑詳議官。梓州妖人白彥歡。依鬼神。

以詛殺人。獄具以無傷讞。適曰。殺人以刃。或可拒。而詛可拒乎。是甚於刃也。卒論死。

### 酷吏赦勿叙

宋仁宗時。廣州司理叅軍陳仲約。誤入人死。有司當仲約公罪。應贖。仁宗謂審刑院張揆曰。死者不可復生。而獄吏雖廢。復得叙官。命特治。會赦。勿叙用。

### 熙寧罪不孝

宋熙寧二年。內殿崇班鄭從易。母兄俱亡于嶺外。

歲餘方知。請行服。神宗曰：「父母在遠，當朝夕爲念。」乃經時無安否。以至踰年不知存亡。邪特除名勒停。

### 宋庠鞠給奴

宋庠知審刑院。密州豪王解私釀酒。鄰人往捕之。解給奴曰：「盜也。」盡使殺其父子四人。州論奴以法。解獨不死。宰相陳堯佐議釋解。庠力爭。卒抵解死。

### 議盜殺同黨

宋韓忠獻公琦知審刑院。先是盜殺同黨。旣自己就捕。例不抵死。忠獻曰。此但并有其貲。或就滅其口。非有改過自新之心。無足矜者。請更其法。乃詔盜殺其徒而不首者。無得原。

### 李綱械統制

宋李綱字伯紀。爲湖廣宣撫使。有統制官張忠彥者。駐軍廣州。頗擾一路。綱召之不來。綱察忠彥樂爲郡檄。令權知岳陽。忠彥果至。卽械送所司。請旨誅之。

殺官謀妻獄

宋建炎初。中州仕宦者。踉蹌至新市。暫詣寺居。親舊絕無。牢落淒斷。其縱跡茫茫。殊未有所向。寺之僧忽相過。存問時餽酒肴。仕宦者感之。語次問其姓。則曰姓湯。而仕宦之妻亦姓湯。因是通譜系。爲親戚。而致其周旋。餽遺愈厚。一日告仕宦曰。聞金人且至。台眷盍早圖避地邪。仕宦者曰。某中州人。忽到異鄉。且未有措足之所。安有避地可圖哉。僧曰。某山間有庵。血屬在焉。偕處可乎。欣然從之。卽



日命舟以往。虜已去。僧曰：事已小定，駐驛之地不遠。公當速往受任。仕宦者告以闕乏。僧於是辦一舟，贈鏹二伯，緡使行。仕宦者曰：吾師之德于我至厚，何以爲報？僧曰：旣爲親戚，義當爾也。乃留其妻孥于庵中，將別爲酌飲。大醉遂行。舟中酣睡，覺時日已高，起視乃泊舟大湖中。四旁十數里無居人。惟舟人語諄諄。過午，督之使行。良久，湧應曰：今行矣。旣而取巨石磨斧。仕宦者罔知所措，叩其所以。則曰：我等與官人無怨，不忍下手。官人當作書別家。

原缺

取者思求得一人詰之悉黥其黨隸兵間

蕭貫治非部

宋蕭貫知饒州。有撫州司法叅軍孫齊者。初以明  
法得官。以其妻杜氏留里中。而給娶周氏入蜀。後  
周欲訴於官。齊斷髮誓出杜氏。久之。又納娼陳氏。  
挈周所生子之撫州。未踰月。周氏至。齊猝至廡下。  
出僞券曰。若傭也。敢爾邪。乃殺其所生子。周訴於  
州。及轉運使。皆不受人。或告之曰。得知饒州。蕭使  
君者。訴之事當白矣。周氏以布衣書姓名。乞食道。

仁宗皇帝系一之卷之十四  
上馳告貫撫非所部而貫特爲治之更赦猶編管  
遠州

李宥得給傭

宋李宥知蘄州或殺人以米十石給傭者使就獄  
曰我重賄吏爾必不死宥得其情論如法

王質論并貲

宋王質知廬州日盜殺其徒并貲而遁捕得之質  
論盜死大理以爲法不應死質曰盜殺其徒自首  
者原之所以疑懷其黨且許之自新此法意也今

殺徒取貲而捕獲貸之豈法意乎疏上不報

### 虞槃斷神巫

元虞槃延佑中除湘鄉州判官有巫至其州稱神降告其人曰某方火卽火又曰明日某方火民以火告者槃皆赴救至達晝夜告者數十寢食盡廢縣長吏以下皆迎巫至家厚禮之又曰將有大水且兵至州大室皆盡室逃槃得却火卒一人訊之盡得巫黨所爲坐捕盜司召巫至鞠之無敢施鞭筆者槃謂卒曰此將爲大亂安有神乎急治之盡

仁德類編 卷之十四 一正方堂  
得黨與數十人。羅絡內外。果將爲變者。同僚皆不敢出視。曰。君自爲之。槃乃斷巫併黨。皆如法。

老嫗不免刑

元荅里麻爲燕南道廉訪副使。日深州民嫗怒毆兒婦死。婦方抱其子。子亦誤觸死。嫗年七十。同寮議免刑。荅里麻獨不可。曰。國制罪人七十免刑。爲其血氣已衰。不任刑也。嫗旣能殺二人。何謂衰老。卒死獄中。

師秦案殺人

元貢師泰官紹興時游徼徐裕以巡鹽爲名肆暴村落一日遇諸暨商奪其所齎錢撲殺之投屍於水走告縣曰我獲私鹽犯人畏罪赴水死矣官驗視有傷疑之遂以疑獄釋師泰覆案之具得裕所以殺人狀復俾待報

### 好文正怙勢

元李好文順帝至元中拜監察御史錄囚河東王傳撒都刺以足蹋人至死衆皆曰殺人非刃當杖之好文獨曰怙勢殺人甚於用刃况因有所求而

殺人其情爲尤重。乃寘之死。河東爲之震。蕭。

### 覆舟困重罰

國朝武昌與漢陽二郡。東西夾江而岐。相去五六里。行旅往來。非錢穀不濟。一日陰雨四塞。風濤洶洶。舟子艤舟而渡。滿載矣。猶招招不已。或戒之曰。風甚矣。少載猶可以免。不聽。未至中流而舟覆矣。溺者二十有六人。而舟子獨不死。法司數加榜捶。欲寘之死。藩大夫曰。是罪可死也。而法則不麗。奈何。今夫不量小大。不測夷險。任非其分。以溺人而



倖免者多矣。可勝誅乎。法司猶不釋。乃重罰以困之。

子業治趙遠

高叔嗣字子業。爲山西按察使。祁縣十長趙遠。以捕盜起家。萬金。常縛村民野寺。誣爲盜。得貲。遠僕更汚民妻。慮僧發覺。致民縣獄。妻列狀呈官。遠曰。民不死。禍且及。設譎給縣官。縣官懼。聽遠入獄。磔民屍。擲屍獄外。上官止治遠僕罪。薄遠罰。子業曰。安有僕屬殺人。而長若主不與者乎。卒正遠罪。

不雅判糾之卷之十四  
按遠之磔民屍誠可恨抑縣官之聽其入獄磔屍亦不可不示懲也

### 何公革宣撫

何喬新字廷秀爲刑部侍郎播州宣慰使楊愛壁妾乃寵其子友欲奪嫡子愛諸小酋不肯從輝矯奪大壩鎮篁諸夷寨立懷遠宣撫司立友爲使張都御史輒爲輝畫請得旨會愛母死友母益橫顯其家結兇黨誣愛反交通唐王朝廷疑遣公卽訊友母子又輦金寶賄諸權貴人欲公囚愛聽命衆籍籍爲友遊說必欲去愛公至盡得友母子奸惡

罪上白愛無謀反。革友宣撫。削官銷印。遷保寧。與  
產業自便。播州遂定。

仁獄類編卷之十四終

仁獄類編

八卷之十四

六

直方堂

仁獄類編卷之十五

新安余懋學行之父箴

從弟懋禮立之父閱

甥韓起龍校梓

鉤摘凡九十六則

昔人云。惡徼以爲智者。夫徼雖君子之所惡。然施之于訊鞫。亦有不可廢者。蓋世變推移。獄情微曖。機事險于重淵。而詭態匿于深谷。吾誠以感之。而彼玩焉。則用明。吾明以照之。而彼逃焉。

則用巧。巧則不出于微。故有執一而駁百者矣。有語此而徵彼者矣。有卒而懾之者矣。有緩而探之者矣。有微而縱之者矣。有顯而操之者矣。有先而持之者矣。有後而怵之者矣。賢士固用之以藏其智。憮人亦用之以售其奸。雖其用心不同。然以摘深奸而鉤巨猾。則均可爲明勅者之一助也。典獄者得其術而以先覺行之。其于明允審克之道不遠矣。爰彙鉤摘。

車裂得刺客

蘇秦在齊。齊大夫多與爭寵。而使人刺蘇秦。不死。殊而走。齊王使人求賊。不得。蘇秦且死。乃謂齊王曰。臣卽死。車裂。臣以徇于市。曰。蘇秦爲燕作亂于齊。如此。則臣之賊必得矣。於是如其言。而殺蘇秦者。果自出。齊王因而誅之。

### 孫寶稱餠

漢孫寶爲京兆尹。有賣餠于都市者。適有村民相逢。擊落皆碎。民甘填五十枚。賣者堅稱三百餘枚。因致誼爭。巡者領赴尹。引問無以證明。尹令鞠

吏買餠一枚。稱知分兩。盡稱碎者。筭足原數。其賣主承伏虛誑之罪。衆稱神明。

黃霸勞行吏

漢黃霸爲潁川太守。有所伺察。擇吏遣行。吏出道旁。鳥攫其肉。後還。霸勞之曰。甚苦。食于道旁。乃爲鳥所盜肉。吏大驚。咸稱神明。

薛宣計分縑

漢薛宣爲臨淮太守。有一人持疋縑。到市賣之。道遇雨。披戴。後人來共庇。及雨霽。當別。因共爭鬪。各

云我縑請府自言。太守宣核實良久。人莫肯首服。宣曰。縑直數伯錢。何紛紛自致縣官。呼騎吏中斷。人各與半。使人聽之。後人曰。受恩前撮之。而縑主稱怨。宣曰。固知其當爾也。因詰責之。具服。悉畀本主。

### 周紆察稻芒

東漢周紆爲邵陵侯相。廷掾憚紆嚴明。欲損其威。乃晨取死人。斷手足。立于寺門。紆聞便往。至死人邊。若與死人共語狀。陰察視其口眼中。有稻芒。密



問守門者曰。誰載藁入城。對曰。唯有廷椽耳。又問。鈐下曰。外有疑吾與死人共語者否。對曰。廷椽紆。乃收廷椽拷問。具服云。不是殺人。但取道邊死人。也。自後莫敢犯之。

陸雲縛共語

陸雲仕吳。爲浚儀令。有人被殺而不獲賊者。雲錄其妻。無所問。遣出。密令吏隨之。曰。有一男子共語。便縛來。果得之。具服同妻謀殺之罪。

周表得盜情

吳周表爲中庶子。時有盜官物者。疑無難士施明。明素壯悍。收拷極毒。惟死無詞。廷尉以聞。權以表能得健兒心。詔以明付表。使自以意求其情實。表便破械沐浴。易其衣服。厚設酒食。歡以誘之。明乃首服。具列支黨。表以狀聞。權深奇之。欲全其名。特爲赦明而誅其黨。

### 國淵比謗書

魏國淵爲魏郡太守。有投書誹謗者。魏武甚疾之。欲得其人。淵請留而不宣。其書多引二京賦。淵乃

勅功曹曰。此郡少學問者。令就師求能書者與受業。因令作牋。比方其書。有似謗書者。收問之。果伏其罪。

### 驅羣得失牛

晉于仲文爲安固太守。有任杜兩家各失牛。後得一牛。兩家俱認。州郡久不決。益州長史韓伯儁曰。于安固少年聰察。可令決之。仲文曰。此易解耳。令兩家各驅牛羣去。乃放所認者。牛遂向任氏羣中。又使人微傷其牛。任氏嗟惋。杜氏自若。仲文遂訶。

詰杜氏服罪而去。

竝走識真盜

冀州有老嫗。日暮遇盜。急呼行路者爲已逐之。卽擒盜。盜反誣行路人。秦籍融曰。二人當竝走。先出鳳陽門者非盜。盜後至。融正色曰。汝真盜也。盜伏罪。蓋融性明察。能懸料其事。若善走則初不被行路人所獲。以此則知善走者是捕逐人也。

李崇鞭女巫

北魏李崇徙楊州。有定州流人解慶賓兄弟坐事。

弟思安背役亡歸。慶賓懼復追責。規絕名貫。乃認城外死屍。詐稱其弟爲人所殺。迎歸殯葬。頗類思安。見者莫辨。又有女巫楊氏。自云見鬼。說思安被害之苦。饑渴之患。慶賓又誣同軍兵蘇顯甫。李益等所殺。經州訟之。二人不勝苦毒。各自款引。獄將決。竟崇疑之。密遣二人。非州內所識者。僞從外來。詣慶賓告曰。僕住在北州。比有一人見遇。寄宿中共語。疑其有異。便卽詰問。乃云是流兵背役。姓解字思安。時欲送官。苦見求。及稱有兄慶賓。今住楊

州相國城內。嫂姓徐。君脫衿愍爲往告。見申委曲。家兄聞此。必重相報。今但見質。若往不獲。送官未晚。是故相造。指申此意。君欲見顧。幾何。當放賢弟。若其不信。可見隨看之。慶賓悵然失色。求其少停。此人具以報。崇攝慶賓問之。伏引。更問顯甫益等。乃云。自誣數日之間。思安亦爲人縛送。崇召女巫示之。鞭笞一伯。

### 李崇辨真子

李崇都督江西諸軍事。先是壽春縣人苟泰有子。

三歲遇賊亡失數年不知所在。後見在同縣趙奉伯家。泰以狀告。各言已子。並有鄰証。郡縣不能斷。崇令二父與兒各在別處。禁經數旬。然後告之曰。君兒遇患。向已暴死。可出奔哀也。荀泰聞卽號咷。悲不自勝。奉伯咨嗟而已。殊無痛意。崇察知之。乃以兒還泰。詰奉伯詐狀。奉伯欵引云。先亡一子。故妄認之。

枷囚得馬盜

北魏高謙之行河陰令。先是有人囊瓦礫。指作錢。

物詐市人馬。因而逃去。詰令追捕。必得所問。謙之乃僞枷一囚于馬市。宣言是前詐市馬賊。今欲刑之。亟遣腹心察市中私議者。有二人相見。忻然曰。無復憂矣。執送案問。悉獲其黨。并出前後盜處。失物之家。各得其本物。乃具以狀告。

### 楊津計獲絹

北魏楊津。除岐州刺史。有武功人齎絹三疋。去城十里。爲賊所劫。時有使者馳驛而至。被劫人因以告之。使者到州。以狀白津。津乃下告云。有人着某



色衣乘某色馬在城東十里被殺不知姓名。若有家人可速收視。有一老母行哭而出云是已子。於是遣騎追之并絹俱獲。

### 惠思拷羊皮

北魏李惠思皇后之父太武時進爵中山王。轉雍州刺史。有負薪負鹽者同釋重擔息樹陰。二人將行負爭一羊皮各言籍背之物。惠遣爭者出謂州綱紀曰此羊皮可拷知乎。羣下咸無應者。惠乃置羊皮于席上以杖擊之。見少鹽屑曰得其實矣。使

爭者視之。負薪者乃伏而就罪。又嘗有燕爭巢。鬪已累日。惠令人掩護。試命綱紀斷之。並辭。惠乃使卒以弱竹彈兩燕。旣而一去一留。惠笑謂吏屬曰。此留者自計爲巢功重。彼去者旣經楚痛。理無固心。羣下服其詳察。

僞榜得刼賊

西魏柳慶領雍州別駕。有胡家被刼。郡縣按察莫知。賊所鄰近被囚者甚多。慶以賊是烏合。可以計求之。乃詐匿名書多榜官門曰。我等共刼胡家。徒

侶混雜終恐泄露。今欲首服。懼不免誅。若聽先首  
免罪。便欲來告。慶乃復施免罪之牒。居二日。廣陵  
王欣家奴面縛自告。牒下。因此盡獲黨與。

給嫗得盜靴

齊任城王潛。拜太保并州刺史。時有婦人臨汾水  
浣衣。有乘馬行人。換其新靴。馳而去者。婦人持故  
靴詣州言之。潛召居城諸嫗。以靴示之。給曰。有乘  
馬人于路被賊劫害。遺此靴焉。得無親屬乎。一嫗  
撫膺哭曰。兒昨着此靴向妻家。如其語捕獲。時稱

明察

王洸計獲盜

北齊彭城王洸爲滄州刺史。有隰沃縣主簿張達。嘗詣州。夜投人舍。食鷄羹。洸察知之。守令畢集。洸對衆曰。食鷄羹。何不還他價直也。達卽伏罪。合境號爲神明。又有一人從幽州驢馱鹿脯。至滄州界。脚痛行遲。偶會一人爲伴。遂盜驢及脯去。明日告州。洸乃令左右及府僚吏分市鹿脯。不限其價。其主見脯識之。推獲盜者。後轉都督定州刺史。時有

人被盜黑牛。背上有白毛。長史韋道建謂中從事  
魏道勝曰。使君在滄州日。擒姦如神。若捉得此賊。  
定神矣。洩乃詐爲上符。市牛皮。倍酬價直。使牛主  
認之。因獲其盜。建等嘆服。又有老母王姓。孤獨種  
菜三畝。數被偷。洩乃令人密往書菜葉爲字。明日  
市中看菜葉有字。獲盜。爾後境內無盜。

### 應募驗劫盜

麥鐵杖。陳大建中。結聚爲盜。廣州刺史歐陽頠。俘  
之以獻。沒爲官戶。配執御傘。每罷朝後。行百餘里。

夜至南徐州踰城而入。行光火劫盜。旦還。及時仍  
又執傘。如此者十餘度。物主識之。州以狀奏。朝士  
見鐵杖。每日常在。不之信也。後數告變。尚書蔡徵  
曰。此可驗耳。御仗下。購以百金。求人送詔書與南  
徐州御史。鐵杖出。應募齎而往。明日及奏事。帝  
曰。信然。爲盜明矣。惜其勇捷。誠而釋之。

### 蔣常覘嫗語

唐蔣常。貞觀初。爲御史。時衛州板橋居人張逃。其  
妻歸寧母家去。是夜有二衛士楊正等三人。投逃

店借宿。夜有人取正刀殺逃。將刀仍還鞘內。正等不知也。至五更早發去。天明逃家知覺。率店人追捕正等。拔其刀。血甚狼藉。囚禁拷訊。遂自誣服。上疑之。遣常覆推。至則集店居人追詰。佯爲人數不足。且放之去。唯留一老嫗。年八十以上。日晚放出。令典獄密覘之。曰。嫗出當有人共語者。卽記姓名。勿漏泄。果有一人共語。卽記之。明日復爾。其人又問嫗云。使君作何推勘。如是三日皆然。常總集男女三百餘人。就中喚與老嫗語者。詰之。具伏殺逃。

姦妻之罪。奏之。賜常縑三百疋。

### 王璈案伏聽

貞觀間。李行詮之子。與父妾亂。事露。相與逃匿。長安縣捕獲之。縣司王璈。推問不伏。璈密令一人藏于案褥下。伏聽。詐令一人走報。長吏喚璈。璈卽鎖門去。留犯在庭中。與父妾四顧無人。多爲私密之語。伏者聞之。俟璈至。出報之。各大驚伏罪。

### 蒙盜得匿牛

唐張允濟。爲武陽令。鄰縣有以牯牛依其妻家者。



八九年牛孳產至十餘頭。及將異居。妻家不與。縣司累政不能決。其人詣武質于允濟。允濟曰。爾自有令。何至此也。其人垂泣不止。具言所以。允濟遂令縛牛主。以衫蒙其頭。將詣妻家村中。云捕盜牛賊。召村中牛悉集。各問所從來處。妻家不知其故。恐被連及。指其所訴牛曰。此是女壻家牛也。非我所知。允濟遂發蒙。謂妻家人曰。此卽女壻。可以牛歸之。妻家叩頭伏罪。

集童擒直盜

唐韓思彥使并州。方賊殺人。主名不立。一醉胡懷刃而汗。訊掠已伏。思彥疑之。晨集童兒數十。暮出之。如是者三。因問兒出。亦有問者乎。皆曰有。乃物色推訊。遂擒真盜。

### 楚金辨補字

則天垂拱中。羅織事起。湖州左史江琛。取刺史裴光制書。割取字。合成文理。詐爲徐敬業反書。以告及差使推光。欵云。書是光書。語非光語。前後三使。盡不能決。勅令張楚金按之。又不移前欵。楚金憂

悶。仰卧向牕明處。見其字皆補葺作成者。因集州縣官吏。索一杯水。令琛取書投于水中。字一一解散。琛叩頭伏罪。奉勅令決一百。然後斬之。賜楚金絹一百疋。

無名識盜葬

天后時。嘗賜太平公主鈿合寶物。直黃金千鎰。公主納之藏中。歲餘欲取之。盡爲盜者所得矣。公主言之。天后大怒。自召洛陽長吏謂曰。三日不得盜罪長吏。長吏懼。謂兩縣主官曰。兩日不獲盜。

當死。尉謂吏卒游徼曰：「一日必獲盜，不獲必死。」吏卒游徼懼，計無所出。途中遇湖州別駕蘇無名，相與請至縣。游徼謂尉曰：「得盜者來矣。」尉怒吏卒曰：「何誣辱別駕？無名笑曰：「君無怒吏卒，亦有由也。無名歷官，所在擒姦摘伏，有名。每有盜者至無名前，無得過者。此輩應先聞之，故見請爲解危耳。」尉喜，請其方。無名曰：「與君至府，君可先入白之。」尉與長吏大悅，降堦執其手曰：「今日遇公，吾當復生矣。」無名曰：「請君聞于天后，長吏由是奏之。」天后召而謂

曰卿得賊乎。無名曰願委臣取賊。無限日月。且寬府縣官吏。仍以兩縣吏卒盡以付臣。臣爲陛下取之。亦不過數日矣。天后許之。無名戒吏卒曰。十人五人爲侶。于東門伺之。見有胡人與黨十餘輩。皆衣縷絰相隨。出赴北邙者。可踵而報之。吏卒伺之。果得馳白無名。問伺者曰。胡何向。伺者曰。胡至一新塚。設奠哭而不哀。徹奠卽巡行塚傍。相視而笑。無名喜曰。得之矣。因使吏卒盡執諸胡而發其塚。剖棺視之。皆寶物也。奏之天后。天后曰。汝用何策。

而得此賊邪。對曰：非有他計，但識盜耳。臣到都之日，卽此胡出葬之時。臣見卽知是盜，但不知葬處。今當拜掃，計必出城，尋其所之，卽知其墓。賊旣奠哭不哀，明所葬非人也。相視而笑，喜墓無所傷也。向陛下迫促府縣，此賊計急，必取而逃之。天后曰：善。賜金帛，遷秩二等。

### 李愿購亡馬

唐李愿，西平郡王之子。元和元年，檢校禮部尚書兼夏州刺史。客有亡馬者，以狀告愿。愿以狀牒于

路懸金以購之。不三日。所亡馬繫之榜下。仍置書一緘曰。馬逸及羣。不時告罪當死。敢以良馬一匹贖罪。并亡馬謹納于路。愿付客亡馬。而縱其良馬。境內嚴肅。

### 魏杲辨藏婢

唐中書舍人郭正一。破平懷。得一高麗婢。名玉素。極姝艷。令專知財物庫。正一夜須漿水粥。非玉素煮之不可。玉素乃毒之。良久。覓婢不得。并失金銀器四十餘事。錄奏。勅令求賊甚急。主帥魏杲有異。

策請喚舍人家奴。選少年端正三人。布衫蒙頭。及縛衛士四人。問十日以來。何人覓舍人家奴衛士。云。有投化高麗留書。遣付舍人捉馬奴。其書見在。檢之云。金城坊中有一空宅。卽往搜之。至一宅。封鎖甚密。打鎖開之。婢及投化高麗竝在其中。拷問。乃是投化高麗共捉馬奴藏之。奉勅斬于東市。

張鷟括詐書

唐張鷟爲河陽尉。有呂元者。詐作倉督馮忱書。盜糶倉米。究之。忱不認書。元乃堅執。不能斷。鷟取元



仁義錄卷之二十一  
告狀用紙貼兩頭。唯留二字。問是汝書。卽註云非。  
乃去貼。卽是元狀。先決五十。又貼詐爲馮忱書。留  
二字以問之。註曰是去貼。乃詐書也。元於是叩頭  
伏罪。

### 張鷟計匿鞍

有一客驢韁斷。并鞍失之。三日尋不獲。詣縣告。張  
鷟追捕甚急。賊乃夜放驢出。而藏其鞍。鞍可值五  
千文。鷟曰。此易知也。遂不令秣飼。去轡放之。驢尋  
向餵處。乃令搜索其家。于草積下得鞍。人服其智。

崇龜集屠刀

唐劉崇龜鎮南海有富商之子少年而貌美泊船于高岬之次有高門中見一姬年二十餘艷態妖容殊不避人少年乘便言曰某黃昏當詣宅矣姬無難色微笑而已既昏姬果啓扉伺之富商之子未及赴約有盜者徑入行竊見一房無燭卽突入姬卽趨而就之盜以爲人擒已也以刀刺之遺刀而逃其家亦未知覺商家之子旋至纔入其戶卽踐其血汰而仆地初謂其水以手捫之聞逗血之

聲未已。又捫之。有人卧。遂徑走出一夜解維比明。已行百里餘矣。其家跡其血至江畔。遂狀訟于主者。窮詰。畔上居人云。近日有某客船一隻。夜來徑發。官差人追及。械至。拷掠備至。其實吐之。唯不招殺人。其家以刀納于府主。乃屠刀也。府主乃下令曰。某日設會。合境庖丁。俱集于場。以俟宰殺。既集。乃傳令曰。今日已晚。可翌日而至。乃各留刀于廚而去。府主乃命取入諸刀。以殺人之刀換下一口。來日。各令詣衙取刀。諸人皆認本刀而去。惟有一

磨最在後。不肯持刀。府主乃詰之。對曰。此非某刀。又詰之曰。此某人之刀也。乃問其所居。命擒則竄矣。於是乃以他囚合處死者。以代商人之子。侵夜斃之于市。竄者之家。日日潛令人伺之。旣斃其假囚。不兩夕果歸家。卽擒之。具首殺人之罪。遂置于法。商人之子夜入人家。杖背而已。

### 閩濟計沉鉤

唐閩濟鎮江南。有舟人傭載商貨。客有銀一十錠。密隱之貨中。舟人潛窺之。伺其下岬。乃盜之。沉于

船泊之所。船夜發至鎮。點閱乃失其銀。遂執舟者以見公。公問曰。客昨者宿何所。曰。此百里浦汊中。公令武士與船夫同往索之。公密謂武士曰。必是船人盜之。沉于江中矣。爾可令楫師沉鉤之。其物必在。若獲之。必受吾重賞。乃依公命。鉤而引之。銀在篋中。封署猶全。而獻于公。公効之。舟者立承伏法。

莊遵壁聽姦

莊遵初爲長安令。後遷爲楊州刺史。性明察。嘗有

婦與姦夫殺其夫者。其叔覺而逐之。婦人卽以血塗叔。因大呼曰。叔何欲愛于我而殺其兄邪。卽告官。官司拷其叔大過。因而誣服。遵察知之。故謂吏曰。叔爲大逆。速置于法。可放嫂歸。密令人夜中隱于婦壁下聽之。其夜姦者果來。問曰。刺史明察。見叔寧疑之邪。婦曰。不疑。因相與大喜。吏卽擒之。伏罪。叔遂獲免。

### 子雲斷犢牛

唐衛州新鄉縣令裴子雲。素有奇策。有部人王恭

戍邊留犂牛六頭寄養母舅李璉家五年產犢三十頭價值十千以上恭還乃索牛母舅曰犂牛二頭先已死其四頭又老矣今產育者並非汝牛所出恭忿之訴于子雲子雲密送恭獄遂下令收追盜牛賊卽拘李璉至縣子雲叱之曰賊引汝同盜牛三十頭藏汝莊內喚汝共對乃以布衫蒙恭頭立南墻下璉急吐款云牛三十頭皆是我外甥犂牛所生實非盜得者子雲遣去恭布衫璉驚曰此外甥也子雲曰若是卽當還牛更欲何語璉默然

子雲曰。五年養牛辛苦。與牛五頭。餘竝還恭。一縣伏其明察。

松壽潛伺盜

唐張松壽任長安令。時昆明池側有劫盜。奉勅十日內須獲。松壽至行劫處檢蹤。見一老姥樹下賣食。卽以從騎馱入縣。供酒食。經五日。送還舊坐處。令一腹心人潛伺之。有人共老姥語。卽挽來。果有人來問。明府作何推勘。卽捉以布衫蒙頭。送縣。一問併黨與贓俱獲。時人以爲神。



趙和籍舍產

唐趙和咸通中爲江陰令。有淮陰二農比莊俱以殷富貨殖。其東鄰則以莊券質于西鄰。貸緡百萬。且言來歲賣本以贖券。至期先納百千緡。期明日以餘資換券。因隔宿且恃通家。不爲納緡之文。及明日賣餘資至。西鄰遂不認。東鄰以寃訟于縣。邑宰曰。誠知爾寃。其如官中所賴契券無証何。又訴于州。州亦不能理。東鄰不勝其憤。乃越江訴之和。和曰。縣政甚卑。且復踰境。何能理也。東鄰泣訴曰。

至此若不能理終無由自滌也。和曰：第止署內，試爲爾思之。經宿召前曰：計就矣。爾果不妄否？曰：安敢厚誣。和曰：誠如是，則當爲寘法。乃召巡捕之幹者數輩，齎牒至淮陰，曰：適有寇江者，按劾已具。言有同惡者在某處，姓名形狀甚悉，請捕送之。牒至，捕西鄰以還。至則跪于庭下。和厲聲曰：何爲寇江？對曰：稼穡之夫，未習舟楫。和曰：所盜皆金銀錦綵，非農家所宜蓄者。汝宜籍舍之產以辯之。囚乃言：稻若干斛，莊人某還者，紬絹若干疋，家機所出者。

錢若干貫。東鄰贖契者。銀器若干件。匠某造成者。和乃大喜曰。汝雖非寇江者。何諱東鄰贖券百千緡邪。遂引訴鄰令。檢付契書于東鄰。置之干法。

### 燒猪辨殺夫

五代時。吳人張舉。爲句章令。有妻殺夫。因放火燒舍。乃詐稱火燒夫死者。夫家疑之。詣官訴妻。妻拒而不承。舉乃取猪二口。一殺一活。乃積薪燒之。察殺者口中無灰。活者口中有灰。因驗夫口中果無灰。以此鞫之。妻乃伏罪。

憲之知牛主

南梁顧憲之爲建康令。有失牛者。盜與主兩俱認之。不能制。乃令縱牛任其所去。牛知主所居。盜者伏罪。

慕容智伏罪

五代漢慕容彥超。善捕盜。爲鄆帥日。有州息庫。遣吏主之。有人以白金二錠。質錢十萬與之。旣去而驗。乃假銀也。彥超知其事。召主庫吏。密令出榜。詐稱被盜竊所質。白銀等物。能捕獲原賊者。賞錢一

萬不數日間果有人來贖銀者執之伏罪人服其智有獻新櫻桃干桃彥超令主者收之俄而爲給役人盜食主者白之彥超呼給役之人僞安慰之曰汝等豈敢盜新物邪蓋主者誣執耳勿懷憂懼各賜以酒彥超潛令左右入黎蘆散既飲之立皆嘔吐則新櫻桃在焉於是伏罪

伯通嗜鋤刃

路伯通爲原武令有以種瓜爲業者一夕爲人盡鋤其苗詣通陳告無明証卽遣之翌日托以他用

命種瓜鄰近村莊。盡借所有之鋤。令各書姓名。潛使人嗜鋤果有苦味者。默遣吏捕獲。遂伏其罪。

### 顯之勘詐契

趙顯之爲閭鄉令。一農家累歲借粟于富者。而厚償其利。有一歲別營足食。而不用借貸。富者怨之。以爲借于別主。乃賂先保人同捏借粟文字。以騙之。不服。訟于官。顯之曰。此易見耳。乃監保人及富者。各爲異處。以物色審之。云搬借粟時。大車邪。小車邪。斛打邪。倉中邪。窖中邪。取狀各異。遂伏騙賴。

之罪

鬻牛得割舌

宋包拯知天長縣。有盜割人牛舌者。主來訴。拯曰。第歸殺而鬻之。尋復有來告殺牛者。拯曰。何爲割人牛舌而又告之。盜驚伏罪。

惟濟購僞金

宋錢惟濟。仁宗朝。知成德軍。民有僞作白金質取緡錢者。其家來告。惟濟曰。第聲言被盜。示以重購。質者當來責餘。真卽得之矣。已而果然。

穆衍訊牛舌

宋穆衍調華池尉。民牛爲仇家斷舌。不知何人。訟于縣。衍命殺其牛。明日。仇以私殺告。衍曰。斷牛舌者。乃汝邪。訊之具服。此與包拯斷牛舌事同。

秦檜詰盜榴

宋秦檜在相位。左揆閣前有榴。每著實。檜默數焉。忽亡其二。檜不之問。一日將排馬。忽顧左右取斧伐樹。有親吏在傍。倉卒對曰。實甚佳。去之可惜。檜反顧曰。汝盜吾榴。吏叩頭伏罪。



單煦縱盜食

宋單煦徙清平軍使。有二盜殺人。捕治不承。煦縱使之食。甲食之既。乙不下咽。既而訊之。果殺人者。

驗字得詐騙

宋鄭噩爲臨江軍錄事叅軍。有僧慙范模者。曰。模善爲騙。吾攜吾疏乞錢。而模使其徒黃文昌致吾空寺中。僞出姓名。謬多題施目數。取錢物酒食。以相報。設今巨費矣。然無左驗。有司疑之。公令取紙雜問模他事。徐視其答。則有與題施之字同者數。

十鞠之果模與文昌謀改筆易書以詐之也。遂伏罪。

桑懌縛盜衣

宋桑懌。開封雍丘人。再舉進士不中。徙居汝潁間。諸縣多盜。懌自請補耆長。得往來察姦。因召里中惡少年戒曰。盜不可爲。吾不汝容也。有頃。里老父子死未殮。盜夜脫其衣去。父不敢告縣。懌疑少年王生者。夜入其家。得其衣。不使之知也。明日見而問之曰。爾許我不爲盜。今里中盜屍衣者非爾邪。

少年色動卽推仆地縛之詰共盜者姓名盡送縣皆伏辜

桑懌就媪飲

桑懌擢右班殿直。未安縣巡檢。明道來京西旱蝗。有惡賊二十三人。樞密院召懌至京師。授以賊名。姓使往捕盜。曰盜畏吾名必潰。潰則難得矣。宜先示之以怯。至則閉柵。戒軍吏不得一人輒出。屠數日。軍吏不知所爲。數請出自效。輒不許。夜與數卒變爲盜服以出。跡盜所常行處。入民家。民皆走。獨

一媼留爲具飲食。如事羣盜。懌歸。閉柵。復往。自攜具。就媼饌。而以餘遺媼。媼以爲真盜。乃稍就媼。與語。及羣盜。一媼曰。彼聞桑殿直來。皆遁去。近聞閉營。不出。知其不足畏。今皆還矣。某在某處。懌又三日往。厚遺之。遂以實告曰。我桑殿直也。爲我察其實。而慎勿泄。後三日復來。於是媼盡得居處之實。以告懌。明日。部分軍士。盡擒諸盜。其尤強梁者。懌自馳馬以往。士卒不及從。惟四騎追之。遂與盜遇。手殺三人。凡二十三人。一日皆獲。

陳襄計捫鐘

宋陳襄爲蒲城主簿。攝令事。民有失物者。卽捕衆盜至。莫能決。襄給語曰。某廟鐘能辨盜真犯者。捫之。輒有聲。餘則否。乃遣吏先引以行。自率同列詣鐘所祭禱。陰塗以墨。而以帷蔽之。命羣盜往捫。少焉。獨一人手無所汙。蓋畏鐘有聲。故不敢觸。遂訊之。果伏罪。

王端識犢母

宋王端知襄邑縣。有盜人牛犢而鬻于市者。其失

主認之而訟于官。詰盜不服。端取兩家牛母來辨。犢果歸失主之母。盜遂服。

### 張田捕白衣

宋張田神宗時知廣州。廣舊無城郭。民悉野處。田始築東城。環七里。賦功五十萬兩旬而成。初役人相驚以白虎夜出。田迹知其僞。召戒邏者曰。今夜有白衣人出入林間者。謹捕之。如言而獲。

### 元繹詰妻姦

宋元繹爲江寧推官。攝上元令。甲與乙被酒相毆。

擊甲歸卧。夜爲人斷足。妻稱乙告里長執乙詣縣。而甲已死。繹勅其妻曰。歸治而夫喪。乙已伏矣。陰使信謹吏迹其後。望一僧迎笑。切切私議。亟命取僧繫廡下。詰姦狀而吐實。人問其故。繹曰。吾見妻哭不哀。且與傷者同席而襦。無血污。是以知之。

毆叔得認姪

宋李若谷守并州。民有訟叔不認其爲姪者。欲併其財。歷政不能直。李令民還家毆叔。民辭以不敢。李固強之。民如李言。果訟其姪。因而正其罪。分其

財

詭盜歸牛租

宋劉宰。光宗時。授泰興令。鄰邑有租牛。縣境者。租戶于主有連姻。因喪會竊券而逃。它日主之子徵其租。則曰牛死久矣。子累年訟于官。無券可質。官又以異縣置不問。至是訴于宰。宰曰。牛失十年。安得一旦復之。乃召二丐者。勞而語之。故托以他事。繫獄鞫之。丐者自詭盜牛以賣。遣詣其所驗視。租戶曰。吾牛固某氏所租者。丐者詞益力。因出券示



之相持以來盜矣者憮然爲歸牛與租

### 置室得婦情

宋有姑訴婦不養者二宰召二婦并姑寘一室或餉其婦而不及姑徐伺之一婦每以已饋饋姑姑猶呵之其一反之如是累日遂得其情

### 驗蘆得盜釵

宋有富室亡金釵惟二僕婦在置之有司咸以爲兇宰乃令各持一蘆曰非盜釵者詰朝蘆當自若石果盜則長今二寸明日視之一自若一去其蘆

二寸矣。卽訊果伏其罪。

### 侯臨詰寄財

宋朝請郎侯臨爲東陽令。有他邑人因分財私寄姻家。輒爲所匿者。訟累年弗直。乃求理于侯。侯曰。吾與汝異封。法難追治。止令具物之名件而去。後半年縣獲強盜。侯以姻家所匿之物令盜招之。及捕姻家獄對。乃泣請曰。此皆某親所寄者。非盜得也。乃召向日求理之民。驗認還之。

### 餽肉得殺牛

宋朝散大夫錢穌嘗宰秀州有村叟告牛爲盜所殺錢曰若亟歸勿言報吾但密召同村解之遍以其肉餽所知或有怨讐卽倍與叟如言翌日果有人懷肉以告叟私屠牛者錢得而治乃告肉者所殺

雨巖詰寇倖

宋寶祐間吳雨巖知處州一日報添差通判王某來任雨巖十數年前曾與相識及見覺非心疑之一日故令夫人會其家眷凡十八人內一人年老

而憔悴不樂。夫人與從容言王倅舊事。婦人潸然詰之。乃知正雨巘所識王某之妻。蓋寇掠其舟。取其妻。就用其勅。仕至本州添倅也。推勘得實。遂申正其罪。

觀音認姦僧

宋時某州士夫攜妻候差于臨安。嘗與妻聯輿而出。至市井叢雜處。偶停市買。轉盼間不見妻輿矣。聞官執輿夫推問。莫可究竟。年餘忽有輿在寓所門外。乃妻也。妻云。被人扛去。時行數里至大門。從

長廊至暗室下輿當問官人何去。輿夫不答。又行數步。乃僧出招之。拽以入。曰。此間是要性命去處。轉巷數曲。納于暗室中。扃閉甚嚴。僧攜酒餽至。當憂悶不能飲食。僧強合焉。每日兩次送飯。暮則攜酒就與同寢。一日僧忘扃戶。行出暗巷口。遙望有火光。乃是祀觀音燈。遂禮拜願再見天日。解手帕上金錢落索。環繫觀音身。用指甲掐觀音足上成川字文。復回入室。久之覺僧力疲意闌。乃懇之求歸。僧曰。到此本無出理。但念汝本分又可商量。一

夕歡合達旦。天微明。引出暗室下。登輿送至此也。時趙節齋尹京。天方亢旱。祈禱無應。明日行香。集僧衆曰。夜夢觀音感應。凡遠近寺院。但有觀音者。皆迎請至此。若本寺感應。則申朝于寺主加號賜紫。行童竝給度牒。備榜遍排。明日果輻輳迎至內。有身繫金錢落索環。足上畫川字文者。遂集合院僧。令士夫妻于簾內識認之。正本寺主僧也。送獄推問。承服就戮。

移刺責隱錢

金移刺幹里朶。熙宗時遷利涉軍節度使。先是有農民避賊入保郡城。以錢三千寄之鄰家。賊平索之。鄰人諱不與。訴于縣。縣官以無証驗却。乃訴于州。幹里朶陽怒械繫之。捕其鄰人。關以三木。詰之曰。汝鄰乙生。却殺人。指汝同盜。鄰人大懼。始自陳有欺錢之隙。乃責歸所隱錢而釋之。郡人駭服。

### 復亨索佩刀

金李復亨。章宗時調臨晉主簿。護送官馬入府宿逆旅。有盜殺馬。復亨曰。不利而殺之。必有仇者。盡

索逾旅商人過客。有同邑人橐中盛佩刀。謂之曰。刀鱣馬血。煨之則刃青。其人款服。果有仇。

詰盜割牛耳

李復亨遷南河令。盜割民家牛耳。復亨盡召里中人至。使牛家牽牛。通過之。至一人前。牛忽驚躍。詰之。乃引伏。

劉令假鬼語

元至元初。北方有劉縣令。未理任。先以賣藥爲名。間行到邑。採訪邑事。時邑有寇殺一商。官莫能明。



劉訪寇姓名及商某所皆悉。署事三日後。同官方圍坐。佯爲見鬼狀。呼曰。爾告何事。同官及吏卒皆駭。劉空中如與鬼語良久。呼吏筆之。牒尉追捕。及到卽皆準伏。申解上司。咸伏其辜。遠近以爲神明。

### 長孺獲姦盜

元胡長孺。武宗時。爲海寧主簿。民荷溺器糞田。偶觸軍卒衣。卒扶傷民。且碎器而去。竟不知主名。民來訴。長孺陽怒其誣。械于市。俾左右潛偵之。向扶

者過焉。戟手稱快。執詣縣所。杖而償器。又有羣嫗聚浮屠菴。誦佛書爲禳祈。一嫗失其衣。適長孺出鄉。嫗訟之。長孺以牟麥寘羣嫗合掌中。令繞佛誦書如初。長孺閉目叩齒。作集神狀。且曰。吾使神監之矣。盜衣者行數周。麥當芽。一嫗屢開掌視。長孺指縛之。還所竊衣。又有姦事屢問弗伏者。長孺曰。此易易耳。夜伏吏案下。黎明出。姦者訊之。辭愈堅。長孺陽謂令長曰。頃聞國家有詔。盍迎之。叱隸卒縛姦者。東西楹。空縣而出。庭無一人。姦者相謂曰。

事已至此死亦勿承行將自解矣語畢案下吏謹  
而出姦者伏罪衆嘉民有質珠步搖于兄者贖焉  
兄妻愛之給以亡于盜屢訟不獲直往告長孺長  
孺曰爾非吾民也叱之去未幾治盜長孺嗾盜者  
誣兄受步搖爲賊逮兄赴官力辨數弗置長孺曰  
爾家信有是何謂誣邪兄倉皇曰有固有之乃弟  
所質者趣持至驗之呼其弟示曰得非爾家物邪  
弟曰然遂歸焉

游顯杖蒲團

元平章游顯沿檄至明州開分省有城中銀店失  
一蒲團後于鄰家認得鄰人不服因相爭詈平章  
偶至問其故二人以告平章曰一蒲團直幾何失  
兩家之歡杖蒲團十七棄之可也及杖之銀星滿  
地遂罪其鄰

給巾得質珠

元金德潤授台州府錄事判官豪卒質人珠人贖  
焉卒愛珠挈篋將乾沒之給曰汝何多忘珠已歸  
汝矣其可再乎人訟于官公訊之卒諱如初因去

卒巾跪于庭使人持去。謂卒妻曰：汝夫令索，恐汝不信，持此以爲驗。妻視之，果夫巾也。啓櫝還之，卒大慚服。

宣岳裂爭簷

元宣岳字彥昭，仕溫州路平陽州判官。天大雨，民與軍爭簷。民曰：我物而軍取之，軍之辭亦然，絕無證佐者。彥昭命裂爲二，竝驅出，使隸踵其後。軍忿譟不已。民曰：汝自失簷于我，何損邪？隸具以聞。彥昭杖民，令買簷還軍。

葉琛釋張來

元葉琛任歙縣丞。盜發洪氏塚。巡邏吏往驗柩旁。得染人帳冊一紙。若同縣張來所遺者。卽捕來拷掠。久且無證。後一月。績溪獲真盜。來得釋。巡邏吏恐其訴冤也。復嗾盜入之。琛匿來他所。僞使人服來衣巾。出與盜對。盜遙見之。齊罵曰。張來張來。爾誤我矣。琛乃出來問盜爲誰。盜對曰。不識也。來因免去。

商謎得刼賊

元末有人襖被行山徑間。遇惡人。意所負必楮鏹也。擊殺視襖中特楮衾耳。大悔之。乃書楮衾曰。的的孰令爾紙似紗角。問我何處住。五色雲中住。問我是何姓。杓子少箇柄。你也錯。我也錯。不如歸去。的的的。慇官不知主名。召商謎者問之曰。五色雲中煙也。新昌山名。杓子少箇柄。孟也。蓋于姓也。密令隸人往其處踪跡之。久而不得。隸亦了事者。一日坐鑷肆櫛髮。見一人對門賣餅。鼓其槌作的聲。乃揚言曰。某山中刼負紙被者。官察知賊處。

卽來捕也。覘其人有懼色。次日閉門不賣餅矣。遂捕之。果伏其辜。

### 繫賊得囚情

元劉汝翼同知嵩州。兼陽翟縣令。黠賊楮二。養丐者爲子。羅富民鬪毆有勸解者。卽逡巡而退。乃于隱處以大楮擊兒胸背。腫青。隨以藥殺之。明日就富家索命。汝翼知其奸計。械楮送獄。楮咆哮不承。汝翼召尉司宿。賊與楮同繫。以計覘之。數日意相得。乃肯吐露。事旣白。竟償丐者命。一縣稱爲神明。



給女直壻枉

國朝梅應魁。洪武中貢。任寧波府推官。時鄞縣民邵觀奴妻陸氏。潛之母家。其母辛氏匿之。反誣壻殺女死。訴于邑。觀奴逮捕不勝拷掠。遂自誣服。然無跡可徵。獄久不決。上于府。移應魁鞫之。乃併繫辛氏于獄。一日辛之小女來饋母。命收于僻處。給之曰。姊何不出。令汝來饋。引而至者。是人爲誰。乃漏言曰。姊在某處。令其同來。探母消息耳。於是具得其實。亟捕陸氏。明日出示辛。竟伏罪。觀奴之枉。

遂直。

罵官得盜線

周榮。洪武中。知河南府。洛陽民張氏失綿線。不知盜名。訴于府。榮密謂之曰。汝但歸焚香罵府官。不捕盜。有嗔怒者。卽以聞。張如其言。不二日。果有嗔者。一問卽伏。府中稱爲神明。

德成斷牛舌

周德成。洪武中。知休寧縣。有牛在山被害。其舌者。踪跡勿得。則語之曰。曾有人來買者否。曰有之。酬

價不及而去曰。卽其人矣。第殺此牛。必有來買肉告私宰者。已而果然。推問得實。其舌尚在人。神其事可方。包孝肅云。

### 啓讓獲血衣

傳啓讓。永樂中爲河南僉事。時盜殺長葛教諭吳晉及家屬。劫其財。事久不白。訓導俞珂等繫獄死者七人。啓讓微行得生員胡昭者。拘鞠之初。未服。令人給其家。獲故血衣示之。并同行者五人。悉寘于法。人稱其神。

周新辨爭傘

周新。未樂中。任浙江按察使。一日有訴爭兩傘者。甲曰我傘也。乙曰我傘也。新命剖之。各持其半去。陰遣人尾其後。甲曰我始欲助爾傘價之半。得非爾利邪。乙曰傘本我物。寧能低價屬汝邪。尾者以聞。於是正甲罪。

集夫得逃擔

文林知永嘉縣日。有商人糴米。倩人擔之。其人出商不意。從別道去。而踪跡不能得。訟于文。文受其

詞佯爲不理。命姑退。未幾召倉官云。欲下倉視糧。命各廂里長集脚夫于倉。是日文入。命商人立于倉門。脚夫一一過目。果獲其人。遂伏辜。

### 鞭荆察氣樓

武城王道亨爲大同府山陰縣知縣。性敏善斷。有瞽者賣鈔五伯。縉醉臥城南荆樹下。覺則亡矣。訴于道亨。道亨曰。此荆樹爲祟也。卽出城按問。民大駭。皆競從之。令人密捕。不往者得一人。倉皇失措。訊之果服。遣還其鈔。頃之。代府內藏失鈔幣而戶

牖封識宛然。莫知其由。王以道亨有知略。召問之。道亨至。察視氣機。似有物常往來。而非人跡。疑爲徂所竊。乃列幣庭中。伺羣徂過而審焉。一徂果攫取之。因詰其主。主卽欵服。盡還之官。自是鄰邑有訟。皆取決焉。

### 子器斷拔韭

慈谿楊子器。初令崑山。民有種韭一園。將賣時。一夜被讐家採拔俱盡。園主訟于縣。子器取園中一巨石。至縣鞭之。縣人皆入縣中。看望子器令關門。

取看者兩手驗之。有一人兩手指俱有泥痕。卽坐其人。以拔韭之罪。其人具伏。

### 楊武計獲盜

楊武知淄川縣。有盜市人稷米不得。武攝其鄰居者數十人。跪于庭。而謾理他事。不問。已忽厲聲曰。已得盜米者矣。其一人色動。良久。復厲聲言之。愈益色動。武指之曰。第幾行第幾人。是盜者。其人遂服。又有盜田園瓜瓠者。是夜大雨。鳳根蔓俱盡。武疑其讐家也。乃令印取盜者足跡。布灰于庭。攝封。

中之丁壯者令履其上而曰合其跡者卽盜也。最後一人展轉有難色。且氣促甚。武執而訊之。果讐家而盜者也。瓜瓠安然在焉。又一行路者于路旁枕石睡熟。囊中千錢爲人盜去。武昇其石于庭。鞭之數十。而許人縱觀。不與禁。乃潛使人于門外候之。有窺覘不入者卽擒之。果得盜錢者。問之曰。聞鞭石事甚奇。不能不來。又不敢入。求其錢費十文矣。餘以還枕石者。

鞠髯知羣盜



京師有盜劫一家遺一冊子。旦視之。盡富家子弟名。書云某月某日會飲某地議事。或聚博狎娼某地云云。大都如此。凡二十餘人。以白于官。按冊捕至。皆跼弛少年也。良以爲是。各父母亦頗自疑。諸兒皆不逞事。豈信邪。及究羣少。諸飲博事悉實。蓋每偵而籍之也。少年不勝拷毒誣服。訊賄所在。浪言埋郊墳外東南角頭發之。悉獲。諸少年相顧駭絕。本妄語。何爲爾。遂結案伺決。一指揮疑之。數呼鞫。諸少言天亡我。徒弟感公恩耳。亦復何辭。指揮

沉思久曰。吾左右中一髯。職參馬。何得每訊斯獄。輒侍側。因復引囚鞠數四。察髯必至。他則否。猝呼而問之。髯曰。固奴職爾焉。知其他指揮曰。爾欲潰膚邪。呼取炮烙具。髯叩頭曰。公無張皇。恐外漏逸賊。願屏左右。乃曰。初不知事本末。惟盜賂祝令。每治斯獄。必記公與囚言。馳報耳。先予吾千金。約事訖足之。前後獄情盜罔不知。今聚以伺我。幸畀我衆。請悉擒以自贖。指揮令數兵易雜衣。與俱至僻境。盜蟻集以問。兵悉執之一人。不遺。向發賊乃得。

報宵瘞之耳。遂伏法。

輿妓屈盜辯

安吉州富家新娶婦。有盜乘人冗雜時入婦室。潛伏牀下。伺夜行竊。不意明燭達旦者三夕。饑甚。奔出羣搏執之。欲以聞官。盜懇乞曰。我實有罪。但未有所盜。遭捶極矣。幸免聞官。當有以報。否則亦將有說也。富家不從。盜至官曰。我非盜也。醫也。婦有癖疾。令我相隨。常爲用藥耳。宰詰問再三。盜備言婦家事情甚詳。蓋潛伏時所聞枕席密語也。宰信

之逮婦供證富家餽遺關節懇宰免追不從富室  
謀之老吏代請于宰曰彼婦初歸來與盜辨不論  
勝負辱莫大焉彼盜潛入突出必不識婦若以他  
婦出對盜若執之可見其誣矣宰曰善選一妓盛  
服輿至盜遽呼婦乳名曰汝邀我治病乃執我爲  
盜邪宰大笑盜遂伏罪

鞭石得偷鈔

吏部尚書何文淵知溫州府日有人持鈔數千貫  
來納官至府前河邊將鈔安頓石頭上却下埠頭

洗手鈔貫遂爲人持去一時尋不獲愬于府文淵  
取原置鈔石頭至府鞭之衆爭入府看望文淵却  
令關門將入府者俱問罪罰鈔幾十貫其偷鈔者  
將鈔出賣文淵詰納鈔者所從買卽坐賣鈔者以  
罪輸服無詞

莊敏計偵盜

崔莊敏公恭正統間知萊州府高密商人寓于掖  
縣盜竊其貨以去捕者疑其家孫消息所爲同知  
吳祐執孫拷訊誣服公以未獲賊疑之禱于城隍

祠會機兵于軍營搜檢陰使人于四門城樓偵之。已而盜果委其貨于外。偵者捕其人。孫獲免。

### 熊晁還民妻

熊晁任浙江僉事。時平陽軍校掠民妻五年。晁攝其妻至。軍校恐。抱二兒泣曰。妻去兒誰與養。願公憐我。晁命置兒妻側。兒避不肯近。晁曰。此非其子詐也。詰之。果鄰家子。罪校如律而斷其妻還于民。

### 易貴斷盜紙

易貴。成化間守辰州。有窶人擔紙勞困。息肩路傍。

不覺寐熟而紙爲盜人所竊矣。訴于貴。即使人擡失紙處一石到府。至堦下杖焉。入門擁觀者如市。遂閉門。量罰入門者以資。窶人復密詰曰。汝紙有識乎。曰有。遂俾潛住于府。出公牘買諸賈人。紙送。至卽令書各姓名于上。乃召窶人認之。果得原紙。盜紙者伏罪。

### 王倬辨殺屍

王倬知餘干縣。民有甲爲乙所殺者。獄久不決。倬詰乙曰。非汝殺之。何以竊其屍邪。驗之果然。卽伏

事。有毆人實不死者。其家匿被毆者。以他屍誣之。累辨莫伸。倬廉得匿所。密使捕至縣。竟抵誣者罪。

### 閱曆得被殺

許襄毅公進。遷山東副使。東昌有武官子懷數金。挾一書生飲酒家。是夜武官子被殺。有司疑書生。逮生酷訊。生誣服。公閱牒疑。托他事徧取商曆入閱。至布商家。乃武官子死之明日。酒人市數十布。價厚。公曰。此必武官金也。一訊遂服。書生得釋。

### 給問得真屍



許襄毅按泰安州。有一富豪。姦鄰縣顧工人妻。因  
其夫有怒言。撻之折股而死。弃屍于壑。死者之兄  
聞諸官。反坐誣告于公。公親鞫之。詞慣熟。無可入  
者。公乃取犯人中一篤實者。問其村巷門戶樹石  
之詳。又取一人。問其居止人口孳畜之詳。復取一  
人。語以村巷門戶人口孳畜之詳。其人懼。謂公私  
行知其事也。公復云。折腿而死。必有縛治之物。鄰  
家婦人牽花牛過時。已實告我。汝第言之。合吾所  
聞則已。否則痛加爾刑。其人遂吐實。謂死時以破

箕纏裹其脛夜死屍實不知何在公得其情乃問屍于兇犯實夜棄壑中不知有無公云陸地雨水暴發雖漂流不遠令尋之果獲犯遂正罪

### 設計獲全賊

曹州有省祭趙夔其親被賊夜殺于野趙乃訴于許襄毅公公知賊之必逸也乃罵之曰暮夜殺人豈可指名妄告殺人之辜汝自當之遂加以桎鎖收監仍下令曰被告者許將情來訴羣賊翕然稱寃赴愬無一人後者咸服其辜郡人悅服

子業鞫殺人

高叔嗣字子業官山西按察使有代州生員江棹

與鄰人爭宅址將鬩陰刃族人孜等匿二屍圖誣

鄰人鄰人知不關全昇以宅

鄰人亦智矣哉

棹埋屍室中

數年棹兄千戶楫枉殺其妻棹嗾妻家訴楫併誣

楫殺孜事

此殆孜魂陰使爲之不然棹自楫拷死嗾以孜誣楫孜之冤終不自矣

無後棹與弟爭襲訟上撫按付子業鞫焉子業問

棹曰孜等屍在何所曰楫殺孜埋屍其室不知所

在曰楫何事殺孜棹愕然曰爲棹爭宅址曰爾與

同宅居乎。對曰：異居。曰：爲爾爭宅址，殺人埋屍兄室，有是理乎？問吏曰：搜屍椁室未也。對曰：未也。及命搜屍椁室，掘地得二屍于椁立所，刃踪宛然。椁伏罪。州人曰：十年冤獄也。石州豪吳世傑誣族人世江，世澤姦盜，拷掠度死二十命。世江更數冬不死。子業復獄牘，問曰：盜賊祇布裙一谷數斛。世江有田若廬，富行劫，何也？世傑曰：賊餌色。姦問婦柳曰：盜姦若。對曰：姦也。曰：何時？對曰：夜。曰：夜姦何故？識賊。對曰：世傑教我賊名。世傑伏誣殺人罪。子業

後終湖廣按察使有文名

訪嫗得典財

刑部尚書吳洪弘治己未任福建按察使有富家之主嘗乘篋他出以一奴隨中道忽棄篋與奴遣歸還則爲典財者所害主家訟奴及二傭夫之昇者于官奴曰傭見吾歸而殺吾主傭曰奴引主去而殺之耳吏莫知所在公曰三人者同發主家顧不畏其家屬而中道殺主乎訪其里嫗知典財者有手血濺衣之跡捕其人置于法

彭祥訊匿貲

郭彭祥弘治間知眉州。鄰封合州有兄弟二人。兄宦別省。其貲每托弟攜歸置產。契券俱弟收掌。兄卒于官。嫂扶襯歸家。弟絕無所與。又無籍可稽。嫂訴于州。屢訊不服。乃越境訟之于郭。郭卽隱告者。取獄中賊指扳其弟姓名。同盜某處財物。移文本州。及械至。詰曰。汝與某人爲盜。得財致富。其弟泣曰。某田某宅。皆吾兄仕宦所得者。置之。產券俱在。具狀甚詳。一一錄記。乃率其嫂語之。弟遂款服。悉

還其產

密聽辨劫奪

白惟勤知沁州。先是有婦人獨行遇賊。以沙撲面。奪其服。突有一人救之。比訟。賊反誣救者爲賊。累訊莫辨。勤至。置二囚于室。密置人于箱中。使聽二人言。頃之。鞫問。出箱中人。賊服而救者免。

太合察僧姦

林大合。福建人。爲都司斷事。攝屬中某邑。邑有一小家婦。自母家獨行歸。避雨一野寺中。寺僧延入。

而婦有姿貌。師徒皆欲淫之。乃婦意常在其徒。師怒。殺婦埋園中。次日。母與夫家互尋不得。交相讐。以訟于官。林不能決。而疑必有故。適有一門子得罪。當譴。林曰。汝故以得罪逋出。遍踐村市。但探出此事。當宥汝。久之。門子入此寺。僧師徒以是美男。皆與狎昵。有小沙彌語洩。而沙彌亦不甚悉。入以白林。林曰。是矣。翌日過寺中焚香。頻仰首向天。自應曰。臣知道了。衆僧中獨一僧色變。林卽令縛之。曰。上天已語我。殺某家婦者。汝也。一訊吐實。瘞屍。



出其園中二僧伏罪

視書得狎胥

殷雲霄字近夫。正德間。知靖江縣。民朱鎧死于文廟西廡中。莫知殺之者。忽得匿名書曰。殺鎧者某也。鎧素讐某。衆謂不誣。雲霄曰。此嫁賊以緩治也。密問左右與鎧狎者。誰對曰。胥姚明。雲霄乃集羣胥于庭曰。吾欲寫書各呈若字。視明字類書詰之。曰。爾素狎鎧。殺之何明。大驚曰。鎧將販于蘇。獨吾餞之。利其貲。故殺之耳。乃論殺明。

終